

Faahororaa no te Faaineineraa no te putuputuraa Oraraa e taviniraa

14-20 NO MATI

TAO'A RAU BIBILIA | SAMUELA 1, 14-15

"Mea maitai a'e te auraro i te tusia"

it-2-F 429 par. 1

Auraro

Aita hoē noa "e mea o te nehenehe e mono i te auraro, e titauhia hoi te reira no te fa-na'o i te farii maitai a te Atua. Ua parau Samuelia i te arii Saula: "E mauruuru lehova i te aha? Te tusia animara aore ra te auraroraa i te parau a lehova? Inaha, ia auraro, mea maitai a'e īā i te tusia, e ia faaroo maite, mea maitai a'e īā i te mii o te mau mamoe oni." (Sa1 15:22) Aita ana'e te hoē taata e faaroo, te patoī ra īā o 'na i te parau a lehova, e faaiteraa atoa te reira e aita o 'na e tiatūri ra ia 'na. Aita e taa-ē-raa i rotopu ia 'na e te feia haamori idolo e o te rave ra i te peu hi'ohi'o. (Sa1 15:23; a hi'o atoa Ro 6:16.) Mea au a'e te ohipa roa i te parau noa. Ia ore te hoē taata e rave i te ohipa i anihia ia 'na, mai te huru ra īā e eita o 'na e tiatūri aore ra e faatura i tei horoa mai i teie faaueraa. (Mt 21:28-32) E mana'o paha te taata e navai noa ia faaroo e ia farii i te Parau a te Atua e aita e titauhia ia **rave** i te reira. (Iak 1:22-25) Ua faaara atoa te Tamaiti a te Atua e e rave vetahi i **tei anihia** ia ratou, eita roa 'tu rā ratou e rave i te reira ma te mana'o maitai. Te haapapu ra te Tamaiti a te Atua e eita roa 'tu teie feia e ô i roto i te Faatereraa arii a te Atua, e tuu-roa-hia rā ratou i te hiti.—Mt 7:15-23.

Te mau poe pae varua

it-2-F 598

Aumauui

I mua i te mau tupuraa fifi, e nehenehe te aumauui e turai ia tatou ia rave i te tahī

mea o te ore e tuati ra i te hinaaro o te Atua a hara atu ai tatou i te Atua. Tera tei tupu no te arii Saula. O te ati Amaleka te nunaa matamua tei aro i te mau Israela i to ratou haereraa mai i rapae i Aiphiti. E i te taime i haava 'i te Atua ia ratou, ua faauehia Saula eiaha roa 'tu e aroha i te ati Amaleka. No te faaheporaa rā a to 'na mau taata, aita Saula i faaroo i te faaueraa a lehova. No reira lehova i tatara 'i i to 'na tiaraa arii. (Sa1 15:2-24) Ia pee tatou i te parau-tia a lehova e te maitai o to 'na mau e'a a tutava 'i i te ore e taiva ia 'na, eita tatou e hara mai ia Saula a ere atu ai i te farii maitai a te Atua.

21-27 NO MATI

TAO'A RAU BIBILIA | SAMUELA 1, 16-17

"Na lehova hoi te aroraa"

Te mau poe pae varua

it-2-F 905-906

Saula

I muri a'e i teie tupuraa e i te faatoroaraahia Davida ei arii apī no Israela, ua faarue te varua o lehova ia Saula. I taua taime iho â ra, "vaiiho ihora lehova ia haapeapeahia oia i te mau mana'o ino." I to te varua o lehova faarueraa ia Saula, ua vaiiho lehova ia haapeapeahia Saula i te mana'o ino, ere atura Saula i te hau o te varua mo'a e horuhoru roa 'tu ra to 'na aau e feruriraa. A faaroo ore ai o 'na ia lehova, ua faaite Saula e mea ino te mau hinaaro e vai ra i roto i to 'na aau e feruriraa. Tatara 'tura te varua mo'a o te Atua i to 'na parururaa. I te mea e ua vaiiho te Atua ia haapeapeahia Saula i "te mau mana'o ino," e nehenehe īā e parauhia e "mana'o ino no ō mai ia lehova." No

reira te mau tavini a Saula i pii ai te reira “te mana'o ino o te Atua.” A titau ai hoê o ta 'na mau tavini ia imi i te hoê taata hau-ti kinura, ua ani Saula ia Davida ia hau-ti kinura no te tamărû ia 'na i te taime atoa e haapeapeahia 'i o 'na i “te mau mana'o ino.”—Sa1 16:14-23; 17:15.

28 NO MATI-3 NO EPERERA

TAO'A RAU BIBILIA | SAMUELA 1, 18-19

“A faaite noa i te haehaa ia manuia oe”

Te mau poe pae varua

it-2-F 671-672

Peropheta

Noa 'tu ua maiti lehova i te mau peropheta maoti to 'na varua mo'a, e ere te auraa e ua tamau ratou i te paraparau i raro ae i te aratairaa a te varua mo'a. Ua haere mai râ te varua mo'a o lehova i nia ia ratou i te tahi mau taime papu maitai no te horoa i te mau poroi e titauhia ia ratou ia faaite. (Ezk 11:4, 5; Mi 3:8) E mea puai mau tei tupu i nia ia ratou a turai atu ai te reira ia ratou ia faaite i te poroi. (Sa1 10:10; Ier 20:9; Am 3:8) Aita noa ratou i rave i te mau ohipa maere mau, ua faaite atoa râ ratou i te huru e te haerea faahiahia mau. E faataa paha te reira i te hoê tuhahaa o te auraa o te parau e haa “mai te mau peropheta.” (Sa1 10:6-11; 19:20-24; Ier 29:24-32; a hi'o atoa Ohi 2:4, 12-17; 6:15; 7:55) Ua rave maite ratou i ta ratou hopoia ma te itoito e te măta'u ore. Ua mana'o paha vetahi mea ê roa te huru o te mau peropheta e mea maamaa atoa. Tera ta te mau raatira o te nuu i mana'o no te peropheta lehu a faatavaihia 'i o 'na. I to ratou râ taaraa e e peropheta o 'na, ua faa-roo maite ratou i ta 'na poroi. (Ar2 9:1-13; a hi'o atoa Ohi 26:24, 25.) A imi ai Saula i te haapohe ia Davida, ua “haa [Saula] mai

te hoê peropheta” ra te huru, ua tatara oia i to 'na ahu, “e tiraha ihora i reira aita e ahu i tera mahana e tera po taatoa.” Horo ê atura ia Davida i taua taime ra. (Sa1 19:18-20:1) E ere roa 'tu râ te auraa e ua matau te mau peropheta i te vai tahaa noa, e ere te reira ta te aamu Bibilia e faaite ra. I roto e piti tupuraa ê, ua vai tahaa te peropheta no te hoê tumu papu, te faataiperaa ia i te hoê tuhahaa o te parau tohu. (Isa 20:2-4; Mi 1:8-11) Aita i faataahia no te aha Saula i vai tahaa noa, peneiae no te faaiteite e taata noa o 'ha tei tatarahia to 'na ahu arii e aita e puai to 'na i mua i te mana arii o lehova aore ra no te tahi atu paha tumu.

18-24 NO EPERERA

TAO'A RAU BIBILIA | SAMUELA 1, 23-24

“A tamau i te tiai ia lehova”

w04-F 1/6 22-23

Eiaha e mana'o e e nehenehe to oe tupuraa e taui aore ra e maitai mai i te mau ravea aita e niu Bibilia, a turui râ i nia ia lehova. Ua papai lakobo: “A vailiho râ i te faaoromai tamau ia faahope roa i ta 'na ohipa, ia nehenehe outou e riro ei mea tia roa e te hapa ore i te mau mea atoa, a ore atu ai e ere i te tahi mea.” (lakobo 1:4) E titauhia ia vailiho i te faaoromai tamau “ia faahope roa i ta 'na ohipa” eiaha e faaohipa i te mau ravea aita e niu Bibilia no te faaafaro oioi i te fifi. E puai mai to tatou faaroo e i reira atoa tatou e ite ai i te turu a lehova. Ua faatupu Davida e Iosepha i tera huru faaoromai tamau. Aita raua i imi i te ravea o te ore e tuati ra i to lehova hinaaro, aita atoa raua i haaparuparu i mua i te mau fifi. Ua turui noa raua i nia ia lehova e maoti te reira, ua fana'o raua i te mau haamaitairaa. Ua faaohipa lehova ia raua no te faaora e no

te aratai i to 'na nunaa.—Genese 41:39-41; 45:5; Samuela 2, 5:4, 5.

E farerei atoa tatou i te mau tupuraa o te nehenehe e turai ia tatou ia faohipa i te tahi ravea o te ore e tuati ra i te mau Pāpai. Ei hi'oraa, te toaruaru ra anei oe no te mea aita oe i faaipoipohia 'tura? Mai te peu e e, eiaha roa 'tu oe e ofati i te faaueraa a lehova ia faaipoipo "i roto noa rā i te Fatu." (Korinetia 1, 7:39) Te fifi ra anei to oe faaipoipora? Eiaha e vaiihio i te mana'o o teie ao ia turai ia oe ia faataa ē aore ra ia faataa roa ia orua. (Malaki 2:16; Ephesia 5:21-33) No te fifi i te pae faanavairaa faufaa, mea fifi anei no oe ia aupuru i to oe utuafare? Ia turui tatou i nia ia lehova, eita īa tatou e rave i te tahi noa a'e ohipa tano ore no te fana'o i te moni. (Salamo 37:25; Hebera 13:18) E tutava ana'e i te rave i te maraa ia tatou no te faaoromai tamau i te mau tupuraa fifi a ite atu ai i te rima o lehova e turu ra ia tatou. E faaoti papu ana'e i te turui noa i nia ia lehova e na 'na e horoa mai i te ravea maitai roa "e.—Mika 7:7.